



明史稿



明史稿



明史藁

卷第二十三

光祿大夫

經筵講

官

部尚書加七級

臣王

緒

敕編撰

河渠一

黃河上

黃河自唐以前皆北入海宋熙寧中始分趨東南一合泗入淮一合濟入海金大定明昌中北流絕全河皆入淮元潰溢不時至正中受害尤甚濟寧曹鄆間漂沒千餘里賈魯爲總制導使南漕淮入海明洪武元年決曹州雙河口入魚臺徐達方北征乃開塌場口引河入泗以濟運而徙曹州治於安陵塌場者濟寧以西耐牢坡以南直抵魚臺南陽道也八年

河決開封太黃寺寔詔河南參政安然發民夫三萬人塞之
十四年決原武祥符中有司請興築帝以爲天災令護舊
堤而已十五年春決滎澤秋決滎澤陽武十七年決開封東
月堤自陳橋至陳留二十里又決杞縣入巴河遣官塞
河端被災租稅二十一年夏儀封徙其治於白樓村二十
三年春決歸德州東南口逕夏邑永城發十衛士卒與
歸德民併力築之罪有司不以聞者其秋決開封西華諸縣
漂沒民舍遣使賑萬五千七百餘戶二十四年四月河水暴
溢決原武黑洋山東經開封城北五里之東南出陳州項城
太和潁州潁上東至壽州正陽鎮全入於淮而賈魯河故道
遂淤又由舊曹州鄆城兩河口漫東平之安山元會通河亦

淤明年復決陽武汜陳州中牟原武封丘祥符蘭陽陳留通
許太康扶溝杞十一州縣有司具圖以聞發民丁及十七衛
軍士修築其冬大寒役遂罷三十年八月決開封城三面受
水詔改作倉庫於滎陽高阜以備不虞自是開封城圯至永
樂二年始修築三年河決溫縣堤四千丈濟潞二水交溢滄
民田四十餘里命修堤防四年修陽武黃河決岸八年秋河
決開封壞城二百餘丈民被患者萬四千餘戶沒田七千五
百餘頃帝以國家藩屏地特遣侍郎張信往視信言祥符魚
王口至中灤下二十餘里有舊黃河岸與今河面平濬而通
之使循故道則水勢可殺因繪圖以進時尚書宋禮侍郎金
純方開會通河帝乃發民丁十萬命興安伯徐亨侍郎蔣廷

瓚偕純相治併令禮總其役九年七月河復故道自封丘金龍口下魚臺場會汶水經徐呂二洪南入於淮是時會通河已開黃河與之合漕道大通遂議罷海運而河南水患亦稍息已而決陽武中鹽堤漫中牟祥符尉氏工部主事藺芳按視言堤當急流之衝夏秋泛漲勢不可驟殺宜捲土樹椿以資捍禦無令重爲民患而已又言中灤導河分流使由故道北入海誠萬世利但緣河堤埽止用蒲繩泥草不能持久宜編木爲固填石其中則水可殺堤可固詔皆從其議十一年決遂平十二年壞開封土城二百餘丈十四年決開封州縣十四二十年工部以開封土城堤數潰請濬其東故道報可宣德元年霖雨溢開封州縣十六年從河南布政使言

社符抵儀封黃陵岡淤道四百五十里是時金龍口漸淤而
河復屢溢開封十年從御史李懋言濬金龍口正統二年築
陽武原武滎澤決岸河復決陽武及邳州灌魚臺金鄉嘉祥
越數年又決金龍口陽穀堤及張家黑龍廟口而徐呂二洪
亦漸淺太黃寺巴河分水之處水脈微細十三年方從都督
同知武興言發卒疏濬而陳留水夏漲決金村堤及黑潭南
岸築垂堦復決其秋新鄉八柳樹口亦決漫曹濮抵東昌衝
張秋潰壽張沙灣壞運道東入海徐呂二洪遂淺詔命工部
侍郎王永和往理其事永和至山東修沙灣未成以冬寒停
役且言河決自衛輝宜勅河南守臣修塞帝切責之令山東
三司築沙灣趣永和塞河南八柳樹疏金龍口務使河由故

道明年正月河復決聊城至三月永和濬黑洋山西灣引其
水由太黃寺以資運河修築沙灣堤大半而不敢盡塞置分
水閘設三空放水自大清河入海且設分水閘二空於沙灣
西岸以泄上流而請停八柳樹工從之是時河勢方橫溢而
分流大清不專向徐呂徐呂益膠淺且自臨清以南運道艱
阻景泰二年特勅山東河南巡撫都御史洪英王暹協力合
治務令水歸漕河暹言黃河自陝州以西有山峽不能爲害
陝州以東則地勢平緩水易泛溢故爲害甚多洪武二十四
年改流從汴梁北五里許山鳳陽入河者爲大黃河其支出
徐州以南者爲小黃河以通漕運自正統十三年以來河復
故道從黑洋山後徑趨沙灣入海但存小黃河從徐州出岸

高水低隨濬隨塞以是徐州之南不得飽水臣自黑洋山東
南抵徐州督河南三司疏濬臨清以南請以責英未幾給事
中張文質劾遲英治水無績請引塌場水濟徐呂二洪濬潘
家渡以北支流殺沙灣水勢且開沙灣浮橋以西河口築閘
引水以灌臨清而別命官以責其成詔不允仍命遲英調度
時議者謂沙灣以南地高水不得南入運河請引耐牢坡水
以灌運而勿使經沙灣別開河以避其衝決之勢或又言引
耐牢坡水南去則自此以北枯澀矣甚者言沙灣水湍急石
鐵沉下若羽非人力可爲宜設齋醮符咒以禳之帝心甚憂
念命工部尚書石璞往治而加河神封號璞至濬黑洋山至
徐州以通漕而沙灣決口如故乃命中官黎賢阮洛御史彭

誼協治璞等築石堤於沙灣以禦決河開月河二引水以益
運河且殺其決勢三年五月河流漸微細沙灣堤始成乃加
璞太子太保而於黑洋山沙灣建河神二新廟歲春秋二祭
六月大雨決旬復決沙灣北岸掣運河之水以東近河地皆
沒命英督有司修築英請俟冬月水消四年正月河復決新
塞口之南詔復加河神封號命山東巡撫尚書薛希璉用太
牢祭之至四月決口復塞五月大雷雨復決沙灣北岸掣運
河水入鹽河漕舟盡阻帝復命璞往乃鑿一河長三里以避
決口上下通運河而決口亦築壩截之令新河運河俱可行
舟工畢奏聞帝恐不能久令璞且留處置而命諭德徐有貞
爲僉都御史專治沙灣時河南水患方甚原武西華皆遷縣

治以避水巡撫遲言黃河舊從開封北轉流東南入淮不爲害自正統十三年改流爲二一自新鄉八柳樹決由故道東經延津封丘入沙灣一決滎澤漫流原武抵祥符扶溝通許洧川尉氏臨潁鄆城陳州商水西華項城太康沒田數十萬頃而開封患特甚雖嘗築大小堤於城西皆三十餘里然沙土易壞隨築隨決小堤已沒大堤復壞其半請起軍民夫協築以防後患帝可其奏太僕少卿黃仕儁亦言河分兩派一自滎澤南流入項城一自新鄉八柳樹北流入張秋會通河竝經六七州縣約二千餘里民皆蕩析離居而有司猶徵其稅乞勅所司覆視免徵帝亦可其奏巡撫河南御史張瀾又言原武黃河東岸嘗開二河合黑洋山舊河道引水濟徐呂

今河改決而北二河淤塞不通恐徐呂之水必妨漕運黑洋山北河流稍紆迴請因決口改挑一河以接舊道灌徐呂帝亦從之有貞至沙灣上治河三策一置水閘門臣聞水之性可使通流不可使壅塞禹鑿龍門關伊闕爲疏導計也故漢武堙瓠子終弗成功漢明疏汴河踰年著績今談治水者甚衆獨樂浪王景所述制水門之法可取蓋沙灣地土皆沙易致坍塌故作壩作閘皆非善計請依景法損益其間置閘門於水而實其底令高常水五尺小則拘之以濟運大則疏之使趨海則有通流之利無壅塞之患矣一開分水河凡水勢大者宜分小者宜合分以去其害合以取其利今黃河勢大故恒衝決運河勢小故恒乾淺必分黃水合運河則可去其

害而取其利請度黃河可分之地開廣濟河一道下穿濮陽博陵及舊沙河二十餘里上連東西影塘及小嶺等地又數十餘里其內則有古大金堤可倚以爲固其外有八百里梁山泊可恃以爲泄至新置二閘亦頗堅牢可以宣節使黃河水大不至泛溢爲害小亦不至乾淺以阻漕運其一挑深運河帝諭有貞如其議行之有貞乃踰濟汶沿衛沁循大河道濮范相度地形水勢上言河自雍而豫出險固而之夷斥水勢旣肆由豫而充土益疎水益肆而沙灣之東所謂大洪口者適當其衝於是決焉而奪濟汶入海之路以去諸水從之而洩堤以潰渠以淤澇則溢旱則涸漕道由此阻然驟而堰之則潰者益潰淤者益淤今請先疏其水水勢平乃治其決

決止乃濬其淤時有謂河決宜塞不當疏者帝遣中使卽問
有貞出二壺而穿其一爲五竅注水其中五竅者先涸中使
還報乃詎用其策於是設渠以疏之起張秋金堤之首西南
至濮陽樂博陵陂壽張沙河東西影塘白嶺灣李輦凡五十
里由李輦而上至竹口蓮花池又抵大豬潭凡五十里乃踰
范暨濮又上而西北數百里經澶淵以接河沁又築堰九以
禦河流勿出者長各萬丈實之石而鍵以鐵六年七月功成
賜渠名廣濟沙灣之決垂十年至是口始塞亦會黃河南流
入淮有貞始克奏功凡費木鐵竹石累數萬夫五萬八千有
奇工五百五十餘日自此河水北出濟漕而阿鄆曹鄆間田
出沮洳者百數十萬頃乃濬漕渠由沙灣北至臨清南抵濟

寧復建八閘於東昌用王景制水門法以平水道而山東河患息矣七年夏河南大雨河決開封河南彰德其秋畿輔山東大雨諸水竝溢高地丈餘堤岸多衝決仍勅有貞修築未幾事竣還京入見獎勞甚至擢副都御史天順元年修祥符護城大堤五年七月河決汴梁土城又決磚城北門城中水丈餘壞官民舍過半周王府宮人及諸守土官皆乘舟筏以避軍民溺死無算襄城亦決縣城命工部侍郎薛遠往視恤災戶蠲田租公廨民居以次修理明年二月開祥符曹家溜河勢稍平七年春河南布政司照磨金景輝考滿至京上言國初黃河在封丘後徙康王馬頭去城北三十里復有二支河一由沙門注運河一由金龍口達徐呂入海正統戊辰決

滎澤轉趨城南并流入淮舊河支河俱堙漕河因而淺澀景泰癸酉因水迫城築堤四十里勞費過甚而水發輒傾然尙未至決城壕爲人害也至天順辛巳水暴至土城旣決磚城隨崩七郡財力所築之堤俱委爲無用之地特遣侍郎遠在治雖稍平復而人心惶惶未知所底夫河不循故道併流入淮是爲妄行今急宜疏導以殺其勢若止委之一淮而以堤防爲長策恐開封終爲魚鼈區矣乞勅部檄所司先疏金龍口寬濶以接漕河然後相度舊河或別求泄水之地挑濬以平水患命如其說行之成化七年命王恕爲工部侍郎奉勅總理河道總河侍郎之設自恕始也時黃河不爲患恕專力漕河而已十四年河決開封壞護城堤五十丈巡撫河南都

御史李衍言河南累有河患皆下流壅塞所致宜疏開封西
南新城地下抵梁家淺舊河口七里壅塞以洩杏花營上流
又自八角河口直抵南頓分導散漫以免祥符鄆陵雖陳歸
德之災乃勅衍酌行之明年正月遷滎澤縣治以避水而開
封堤不久卽塞弘治二年五月河決金龍等口入張秋運河
又決埽頭五所入沁郡邑多被害汴梁尤其議者至請遷開
封城以避其患布政使徐恪持不可乃止命所司大發卒築
之九月命白昂爲戶部侍郎修治河道賜以特勅令會山東
河南北直隸三巡撫自上源決口至運河相機修築爲經久
之計三年正月昂上言臣奉命治張秋決河自淮河相度水
勢抵河南中牟等縣見上源決口水入南岸者十三入北岸